



Uunga

Naalakkersuisut Siulittaasuat aamma

Ineqarnermut Attaveqaqatigiinnermullu Naalakkersuisoq

Aningaasaqarnermut ministereqarfik


Københavnnimi, 13 august 2019

Isumaqaqatigiissutip imarisai aamma mittarfiliassani aningaasaqarnermut aammattaarlu inuiaqatigiit aningaasaqarnerannut sunniutaasussat pillugit ataatsimiititaliaq ilisimatinneqariingippat, entreprenørimut ajugaasumut, Munck Gruppen A/S-imut isumaqaqatigiissut atsiorneqassanngitsoq, Naalakkersuisut Kalaallit Airports A/S nalunaarfigissagaat piumasaralugu Aningaasaqarnermut Akileraartarnermullu Ataatsimiititaliaq, Aningaasaqarnermut Akileraartarnermullu Ataatsimiititaliaq Naalakkersuisut Siulittaasuannut aamma Ineqarnermut Attaveqaqatigiinnermullu Naalakkersuisumut allakkiaata 9. august 2019-imeersup assilinera tiguara.

Ingerlatseqatigiiffinnut inatsisinut tunngatillugu oqaaseqaatit

Aallarniutigalugu Kalaallit Airports A/S International A/S sinnerlugu erseqqissassavara, ingerlatseqatigiiffinnut inatsisit atuuttut naapertorlugit aktiaatileqatigiiffiup siulersuisui ingerlatseqatigiiffimmi aktiaatilinnit peqqussutinik malinnittussaataaangimmata, kisianni taamaallaat ingerlatseqatigiiffinnut inatsimmi aalajangersakkat aamma ingerlatseqatigiiffimmut malittarisassat malittussaallugit. Kisiannili ingerlatseqatigiiffimmi aktiaatillit ingerlatseqatigiiffiup ataatsimeersuarnerani piginnaatitaaffimminnik atuisussaallutik.

Tamatuma saaniatigut ingerlatseqatigiiffik Munck Gruppen A/S-imut isumaqaqatigiissummi peqataasoq tassaammat Kalaallit Airports International A/S, aammalu Naalakkersuisut ingerlatseqatigiiffimmi toqqaannartumik aktiaateqartuunngimmata, taamaattumillu Aningaasaqarnermut Akileraartarnermullu Ataatsimiititaliaq imaluunniit Naalakkersuisut ingerlatseqatigiiffiup siulersuisuinut peqqusinissamut piginnaatitaaffeqanngimmata, eqqaasitsissutigisariaqarpara, takuuk ingerlatseqatigiiffiup ilusiligaanera manna:



Kiisalu eqqaasitsissutigissavara Kalaallit Airports International A/S-imi aktiaatillit tassaammata Kalaallit Airports Holding A/S aammalu danskit Naalagaaffiat, aammalu ingerlatseqatigiiffimmi siulersuisut aktiaatilinnit ataasiakkaanit, imaluunniit Inatsisartut Aningaasaqarnermut Akileraartarnermullu Ataatsimiititaliaannit peqqussutinik akuersaarnissamut periarfissaqanngimmata.

Kalaallit Airports Holding A/S-ip aamma danskit Naalagaaffiata imminnut atassuteqarnerat Kalaallit Airports International A/S-imut piginnittut isumaqatigiissutaanni illuatungeriit akornanni atsiorneqareersumi maleruagassiivigineqarpoq. Taamaalilluni Naalakkarsuisut imaluunniit Aningaasaqarnermut Akileraartarnermullu Ataatsimiititaliaq ingerlatseqatigiiffiup aqutsisuiunut sunilluunniit malitassiinissaq kissaatigippassuk (aammalu taamaaliorinnaallutik), tamanna Kalaallit Airports Holding A/S aqutugalugu aammalu Kalaallit Airports Holding A/S-ip aamma danskit Naalagaaffiata akornanni piginnittut isumaqatigiissutaanni atugassarititaasunut tamakkiisumik naapertuuttumik pisariaqarpoq, tassami siulersuisut oqaatigineqareersutut aktiaatilinnit ataasiakkaanit peqqussutigineqartut malinnissaannut ingerlatseqatigiiffinnut inatsisitigut imaluunniit malittarisassatigut inatsimmi tunngavissaqanngimmata.

Pissutsit allat

Munck Gruppen A/S-imut sanatitsisup aamma sanaartortussap isumaqatigiissutaasa imarisai aammalu mittarfiliassani aningaasaqarnermut aammattaarlu inuiaqatigiit aningaasaqarnerannut sunniutaasussat paasissutissiissutigineqarnissaannik kissaateqarneq pillugu Aningaasaqarnermut Akileraartarnermullu Ataatsimiititaliamit oqaaseqaatinut tunngatillugu, qulequuttat ataasiakkaat matuma kingulianiittut ataanni oqaaseqaatit innersuussutigineqarput.

Taamaattoq aallarniutugalugu oqaatigineqassaaq, ingerlatseqatigiiffiup piginnaatinneqarnera malittarisassani aammalu Nuummi aamma Ilulissani nunanit tamalaanit mittarfiit kiisalu Qaqortumi nunap



immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaat nr. 4, 22. november 2018-imeersumi ("sanaartornermut inatsit") aalajangersagaamat. Munck Gruppen A/S-imut sanatitsisup aamma sanaartortussap isumaqatigiissutaannik ingerlatseqatigiiffiup isumaqatigiissuteqarnerani ingerlatseqatigiiffiup piginnaatitsissut Inatsisartunit akuerineqartoq avaqqunneqanngilaq imaluunniit avaqqunneqassanani.

Isumaqatigiissutip imarisai pillugit

Isumaqatigiissutip imarisai pillugit paasissutissinneqarnissaq kissaatigineqartoq pillugu Aningaasaqarnermut Akileraartarnermullu Ataatsimiititaliaq qanoq isumaqarnerseq paasinanngilaq. Isumaqatigiissutinut tunngavissat neqeroortitsinerneq najoqqutassani, neqerooruteqartut neqerooruteqarnerminni tunngavigisaanni, ilaapput, aammalu tassaallutik isumaqatigiissutinut (inatsisitigut) tunngasut aammalu teknikkimut tunngasut (immikkoortunut nassuiaatit il.il.). Sanatitsisup aamma sanaartortussap isumaqatigiissutai nalinginnaasut AP95-imik aallaaveqartut tassani pineqarput, Kalaallit Airports International A/S-ip neqeroortitsinerneq najoqqutassani aalajangersarsimasai allaassutaallutik, aammalu pisuni tamaginni Kalaallit Airports International A/S-imut iluaqutaasussanik allaassuteqarluni.

Munck Gruppen A/S-imut isumaqatiginninniarnit nalaanni isumaqatigiissutinut tunngavissat aammattaq annikinnerusunik iluarsineqarput.

Ataatsimoorlutik isumaqatigiissutit inatsisinut tunngasortai aamma teknikkimut tunngasortai allakkiapput hunnorujunik arlalinnik qupperneqartut, naatsumik nassuiaanermi eqikkarneqarsinnaanngitsut, AP95, Kalaallit Nunaanni inatsisit, aamma isumaqatigiissitsiniartarneq malinneqartussaallutik sanatitsisup aamma sanaartortussap isumaqatigiissutaa pingaarneq nalinginnaalluinnartoq tassani pineqartoq oqaatigineqaannarsinnaalluni.

Mittarfiliassani aningaasaqarnermut sunniutaasussat pillugit

Aamma tassani mittarfiliassani aningaasaqarneq Aningaasaqarnermut Akileraartarnermullu Ataatsimiititaliap qanoq isumaqartinneraa paasinanngilaq.

Taaguummi "mittarfiliassani aningaasaqarneq" sanaartornermut aningaasartuutissarpiaat innersuussutigineqarsimappata, makkua oqaatigineqassaput:

- Aningaasartuutissanut missingersorneqaqqaartut kr. 3,6 mia (2017-imi januarimi akigitat) nalorninartortaartut, Kalaallit Airports-ip aallaqqaataanilu erseqqissarpaa, tassami suliap pissusissamisoornerani aningaasartuutinut missingersuinerit taamaallaat tassani pineqarmata. Ingerlatseqatigiiffiup tamanna tunngavigalugu, sanaartornissamut inatsit naapertorlugu maannamut Namminersorlutik Oqartussanit kr. 2,1 mia., aammalu danskit Naalagaaffiannit kr. 1,6 mia., katillugit kr. 3,7 mia. aningaasalersuinissamut tamarmiusumut qulakkeerpai
- Aningaasartuutissanut missingersorneqaqqaartut kr. 3,6 mia. 2017-imi januarimi akigitat malillugit naatsorsorneqartut, taamaattumillu 2023-imi sanaartornerup naammassinissaata



tungaanut piffissamut aningaasartat nalinginnaasumik akinit
iluarsineqartussaasut, taamatuttaaq Kalaallit Airports-ip
aallaqqaataanilu erseqqissarpaa.

Avatangiisinut piumasaqaatit aammalu qaartiterutissanut toqqorsivimmik
pilersitsinissamut aningaasartuutit qaffasikkaluartut, taakkua marluusut
suliassamut akitsorsaataasimallutik, sanaartornermut akigititaq Munck Gruppen A/S-imut
isumaqatigiissutiginnissaa anguneqarsimasoq, aningaasartuutissanut missingersorneqaaqqaartunut
killissaliussat iluarsisat iluaniitineqartut, oqaatigineqassaaq.

Kisiannili ingerlatseqatigiiffik sanaartornermut aningaasartuutitut aningaasalersuutissanik
annertunerusunik pisariaqartitsilissagaluarpat, aningaasalersuinissamut pisariaqartitsinerup taamaattup
aktiaatilinnit aningaasaatinut annertunerusunik akiliuteqartitsinani, taarsigassarsinikkut
aningaasalersorneqarnissaa ingerlatseqatigiiffiup siunertaraa. Ullumikkut annertussusiliussanut sanilliullugu
ilaasunut akitsuutit qaffanneqartussaassanatik aammalu Nunap karsia nammakkersornagu,
ingerlatseqatigiiffik ajornartorsiutitaqanngitsumik minnerpaamik kr. 500 mio.-inik akiitsoqqissinnaasoq
sullissisinnaasorlu, ingerlatseqatigiiffimmi ingerlatsinermut aningaasaqarnikkut misissueqqissaarnerup
taamaalilluni takutipaa.

Tassunga atatillugu eqqaamaneqassaaq, ingerlatseqatigiiffiup tamanna pisariaqartilissagaluarpagu,
taamaattoq Naalagaaffimmit annertunerusunik aningaasalersuinissamut taamaattumut
qularnaveeqqusiisoqarani, naalagaaffimmit appassisumik ernialinnik annertunerusunik
taarsigassarsitseqqinnissamut danskit Naalagaaffiat akuersaartumik isummertoq, Namminersorlutik
Oqartussat aamma danskit Naalagaaffiata akornanni isumaqatigiissummi isumaqatigiissutigineqarmat.

Taamaalilluni sanaartornermut aningaasartuutit aningaasalersuutissanut ingerlatseqatigiiffiup
pissarsiarisimasaannut aammalu tamanna pisariaqartinneqalissagaluarpat ingerlatseqatigiiffiup
pissarsiarisinnaasaannut killissaliussat avataanniissasut Munck Gruppen A/S-imut isumaqatigiissummi
tikkuussisoqanngilaq, taamatullu isumaqatigiissut sanaartornermut inatsimmut Inatsisartut
akuerisimasaannut killissaliussat iluaniillutik.

Aningaasaqarnermut Akileraartarnermullu Ataatsimiititaliap taaguummumit "mittarfiliassani
aningaasaqarneq" ingerlatseqatigiiffiup aningaasaqarnera tamarmiusoq innersuussutigisimappagu,
oqaatigineqassaaq ingerlatseqatigiiffiup ingerlatsinissamut pilersaarutaa taamanikkut suliarineqarmat
tunngavigisanik pingaarutilinnik makkuninnga aallaaveqarmat (paasissutissat matuma siulianiittut
saniatigut):

- Sanaartornermut aningaasartuutissat missingersorneqartut DKK 3,6 Mia. (2017-imi januaarimi akigititat)
- Ukiuni 4-ini sanaartornerup ingerlanissaa
- Aningaasalersuinermut aningaasartuutissat taarsigassarsianit akiitsut tamarmiusut 1,6 mia.-inik annertussuseqartut ukiumut 4%-ii
- Taarsigassarsiat ukiuni 25-ini akilersorneqartussat
- Ukiumut ilaasut amerleriarnarat agguaqatigiissillugu 2% CAGR ("Compound Annual Growth Rate"), aammalu nunani tamalaani ilaasunik angallassineq tamarmi (nunap immikkoortuani Islandimit



aammalu Qaqortumi mittarfimmit nutaamit angallanneq ilaanani)
Nuuk aamma/imaluunniit Ilulissat aqutugalugu pisassasoq

Ingerlatseqatigiiffiup tamatuma kingorna ilaasunut missingersuinerit sukumiinerusumik suliarai aammalu tamakkiisumik suliareqqissaarlugit, tassani takutinneqarpoq ukiumut ilaasut amerleriarnertat agguaqatigiissillugu 3,5% CAGR, nunani tamalaani ilaasunik angallassineq tamarmi (nunap immikkoortuani Islandimit aammalu Qaqortumi mittarfimmit nutaamit angallanneq ilaanani) Nuuk aamma/imaluunniit Ilulissat aqutugalugu pisassasoq, pillugu tunngavigisaq sulii aallaavigneqartoq. Tassunga tunngasoq mittarfiliassat aningaasaqarneranni tamarmiusumi annertunerusumik pitsanngorsaaqqippoq.

Danskit Naalagaaffiata kr. 700 mio.-inik aningaasaatinut akiliuteqarnerata malitsigisaanik kr. 1,6 mia.-inik ernialinnik akiitsoqalernissaq naatsorsuutigineqaaqartoq tamatuma saniatigut kr. 900 mio.-inut annikillisinneqarpoq, tamannalu mittarfiliassat aningaasaqarneranni tamarmiusumi annertunerusumik pitsanngorsaaqqippoq.

Ernialinnik akiitsoqalernissap annikillisinneqarnerata malitsigisaanik aammalu taarsigassarsititsisartuni erniat pitsaasumik ineriartornerisa malitsigisaanik, aammalu ingerlatseqatigiiffiup naalagaaffiup taarsigassarsititseqqittarneranik taaneqartartoq 2050 tungaanut aningaasalersorneqaaqqissinnaasoq aqutugalugu ingerlatseqatigiiffiup kr. 450 mio.-inik aammalu Den Nordiske Investeringsbank-imit (NIB) ukiuni 20-ini akilersorneqartussani aammalu danskit Naalagaaffiata NIB-imit qularnaveeqqusiinerata malitsigisaanik atugassarititaasut pitsaasorujussuit tunngavigalugit kr. 450 mio.-inik allanik taarsigassarsinnaanerata malitsigisaanik, mittarfiliassat aningaasaqarnerat tamarmiusoq, aningaasalersuinerit aningaasartuutissanuinaq tunngatillugu, ingerlatsinissamut pilersaarutaqqartumut sanilliullugu kr. 1 mia. missaanni pitsaanerulersinneqarpoq.

Kiisalu ingerlatseqatigiiffiup paasivaa, pingaartumik tax free-nut pisiniarfinit assigisaannillu niuernermik tunngaveqartumik isertitassanut missingersuutit allanngortitsiviunngitsorujussuit naatsorsuutigineqartut amerlisinnissaannut tunngavissaqartoq, tamannalu aamma mittarfiliassat aningaasaqarneranni tamarmiusumi pitsanngortitsinissamut iluaqtaassaaq.

Ataatsimut isigalugu taamaalilluni 2017-imiilli mittarfiliassat aningaasaqarneranni tamarmiusumi annertuumik annertunerusumik pitsanngortitsisoqarpoq, tamannalu suliasami aningaasaqarnikkut tunngavissanik pitsanngortitsivoq, kisianni aamma ingerlatseqatigiiffik annertunerusumik aningaasalersuinnissamut pisariaqartitsilissagaluarpat, tamanna kingusinnerusukkut pisariaqalissagaluarpat, aningaasartuuteqarnerannissamut malussarinnginnerulertussaalluni.

Ataatsimut isigalugu taamaalilluni oqaatigineqarsinnaavoq, sanaartornermut aningaasartuuterpiaat 2017-imi missingersorneqartunit (2023 tungaanut akigitat ineriartornerannut iluarsillugit) qaffasinnerulissagaluarpata, mittarfiliassat aningaasaqarneranni tamarmiusumi pitsanngorsaanerit allat annertooujussuupput, taakkua sanaartornermut aningaasartuutit qaffasinnerulissagaluarpata sunniinerlunnissanit annertunerusussaallutik.



Inuiaqatigiit aningaasaqarnerannut sunniutaasussat pillugit

Mittarfiliassani ataatsimoortitani inuiaqatigiit aningaasaqarnerannut sunniutaasussat tamanna pillugu nalunaarusiani marlunni, Ineqarnermut Attaveqaqatigiinnermullu Naalakkersuisoqarfiup suliarititaanni, aammalu Aningaasaqarnermut Akileraartarnermullu Ataatsimiititaliap ilisimariigaanni, sukumiisumik paasinarsisineqarput.

Munck Gruppen A/S-imut isumaqatigiissutini inuiaqatigiit aningaasaqarneranni misissueqqissaarnerit pitsaanngitsumik allanngortinneqarnissaannik pissutissaqalersitsisunut tunngasunik ingerlatseqatigiiffik ilisimasaqanngilaq.

Illuatungaatigut danskit Naalagaaffianut aamma NIB-imut isumaqatigiissutit malillugit ingerlatseqatigiiffiup aningaasalersuinnermut aningaasartuutaasa annertuumik annikillisinneqarnerisa, mittarfiliassat inuiaqatigiit aningaasaqarnerannut sunniutissaat annertunerusumik pitsaanerulersikkaat paasinarsisissinnaavaat.

Kalaallit Airports International A/S sinnerlugu

Johannus Egholm Hansen

Siulersuisunut siulittaasoq